

## KHUTBAH JUMAAT

### “ISTIQAMAH ADALAH KUNCI KEJAYAAN DALAM KEHIDUPAN”

(5 Februari 2021M/ 23 Jamadilakhir 1442H)

---

الْحَمْدُ لِلَّهِ، الْحَمْدُ لِلَّهِ الْغَنِيِّ الْحَمِيدِ. وَأَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ، وَهُوَ عَلَى كُلِّ شَيْءٍ شَهِيدٌ. وَأَشْهَدُ أَنَّ سَيِّدَنَا مُحَمَّدًا عَبْدُهُ وَرَسُولُهُ الْمَبْعُوثُ بِالرَّحْمَةِ وَالْقَوْلِ السَّدِيدِ .  
اللَّهُمَّ صَلِّ عَلَى سَيِّدِنَا مُحَمَّدٍ وَعَلَى آلِهِ وَصَحْبِهِ وَسَلِّمْ تَسْلِيمًا كَثِيرًا.  
أَمَّا بَعْدُ، فَيَا عِبَادَ اللَّهِ، اتَّقُوا اللَّهَ حَقَّ تَقَاتِهِ وَلَا تَمُوتُنَّ إِلَّا وَأَنْتُمْ مُسْلِمُونَ.

#### **Kaum muslimin yang dirahmati Allah,**

Marilah kita bersama-sama meningkatkan ketaqwaan kepada Allah *subhanahu wata'ala* dengan menunaikan segala perintah-Nya dan meninggalkan segala larangan-Nya. Semoga kita beroleh kejayaan, kebahagiaan dan keselamatan di dunia dan di akhirat. Marilah kita bersama-sama mendengar, menghayati dan mengambil iktibar daripada khutbah minggu ini bertajuk :**“Istiqamah Adalah Kunci Kejayaan Dalam Kehidupan”**.

#### **Kaum muslimin yang dirahmati Allah,**

Imam an-Nawawi *rahimahullah* di dalam kitabnya *Riyadus Solihin* menyatakan bahawa makna istiqamah adalah sentiasa mengikut ketaatan kepada Allah *subhanahu wata'ala*. Dalam erti kata lain

bolehlah diertikan *istiqamah* itu sebagai melaksanakan sesuatu perkara secara berterusan. Firman Allah *subhanahu wata'ala* di dalam surah al-Ahqaf, ayat 13 yang berbunyi:

إِنَّ الَّذِينَ قَالُوا رَبُّنَا اللَّهُ ثُمَّ اسْتَقَامُوا فَلَا خَوْفٌ عَلَيْهِمْ وَلَا هُمْ يَحْزَنُونَ ﴿١٣﴾

**Maksudnya:** *Sesungguhnya orang yang menegaskan keyakinannya dengan berkata: "Tuhan kami ialah Allah", kemudian mereka tetap teguh di atas jalan yang betul (dengan pengakuan iman dan tauhidnya itu), maka tidak ada kebimbangan (dari sesuatu yang tidak baik) terhadap mereka, dan mereka pula tidak akan berdukacita.*

Ayat al-Quran tadi mengajar kita akan kepentingan beristiqamah dalam mengingati Allah *subhanahu wata'ala*. Ia juga menjelaskan bahawa istiqamah adalah perkara yang bersangkutan paut dengan amalan agar selaras dengan iman iaitu melalui kata-kata "Tuhan kami ialah Allah". Nyatalah kepada kita betapa Islam mementingkan kesepaduan antara iman dan amal. Tegasnya, untuk kita memperolehi kejayaan di dunia dan di akhirat, maka perteguhkanlah dua tiang utama ini iaitu iman yang mantap dan amalan yang istiqamah iaitu berterusan dan konsisten.

Sesungguhnya, seorang mukmin itu tidak akan berpada dan merasakan bahawa amalannya sudah cukup. Malah, dia akan terus berusaha untuk mencari jalan dan peluang untuk memastikan adanya peningkatan dalam amalan dan ibadahnya. Sebagai

contoh, dia akan berusaha untuk menunaikan solat fardu secara berjemaah bersama keluarga berbanding solat bersendirian, menambah serta mengamalkan sunnah-sunnah Nabi Muhammad *sallallahu alaihi wasallam* yang lain dalam kehidupan sehariannya, dan sebagainya.

Namun, janganlah kita menganggap bahawa amalan yang kita lakukan itulah semata-mata yang dapat menjamin kejayaan dan kebahagiaan di akhirat. Hakikatnya, semua kebaikan yang kita lakukan adalah kerana rahmat dan kurniaan Allah *subhanahu wata'ala*. Iman kita, amalan kita, istiqamahnya kita, semuanya adalah atas limpahan rahmat dan limpah kurnia daripada Allah *subhanahu wata'ala*.

### **Kaum muslimin yang dirahmati Allah,**

Di dalam era serba digital hari ini, begitu mudah bagi kita untuk mendapatkan sesuatu dengan cepat dan pintas. Seperti khidmat pesanan makanan, mendapatkan maklumat terkini, berhubung dengan keluarga yang berjauhan, dan sebagainya. Kadang-kadang kerana sudah terbiasa dengan cepatnya tertunai hajat dan hasrat, kita mengharapkan yang sama pada hubungan kita dengan Allah *subhanahu wata'ala*.

Namun, ia bukan sedemikian rupa dalam permintaan seorang hamba kepada Tuhannya. Tiada jalan pintas dalam mendapatkan kurniaan Allah. Adakalanya Allah mengabulkan permintaan kita dengan segera. Namun, ada masanya juga Allah menahan

kurniaan-Nya buat seorang hamba, dan memberikannya di akhirat kelak. Inilah tanda kasih-Nya buat hamba-Nya. Kerana Dia Maha Mengetahui apa yang baik, serta waktu yang terbaik untuk kita diberikan kurniaan-Nya.

Janganlah berputus asa dengan Allah. Kenanglah segala kurniaan-Nya buat kita. Bersyukurlah di atas nikmat-nikmat yang telah Allah berikan. Teruskanlah beramal dan dekatkan diri kepada-Nya agar kita tidak berasa bersendirian. Ingatlah bahawa istiqamah adalah kunci kejayaan dalam kehidupan.

Semoga Allah *subhanahu wata'ala* menjadikan kita hamba-hamba yang bersyukur dan terpelihara daripada sebarang keburukan. Amin. Ya Rabbal 'Alamin.

Akhirnya, marilah bersama-sama kita menghayati firman Allah *subhanahu wata'ala* dalam Surah Fussilat, ayat 30-32:

أَعُوذُ بِاللَّهِ مِنَ الشَّيْطَانِ الرَّجِيمِ

إِنَّ الَّذِينَ قَالُوا رَبُّنَا اللَّهُ ثُمَّ اسْتَقَمُوا تَتَنَزَّلُ عَلَيْهِمُ الْمَلَائِكَةُ أَلَّا تَخَافُوا

وَلَا تَحْزَنُوا وَأَبْشِرُوا بِالْجَنَّةِ الَّتِي كُنْتُمْ تُوعَدُونَ ﴿٣٠﴾ نَحْنُ أَوْلِيَائُكُمْ فِي الْحَيَاةِ

الدُّنْيَا وَفِي الْآخِرَةِ ۗ وَلَكُمْ فِيهَا مَا تَشْتَهَى أَنْفُسُكُمْ وَلَكُمْ فِيهَا مَا تَدْعُونَ ﴿٣١﴾

تُرْزَلُ مِنْ غَفُورٍ رَحِيمٍ ﴿٣٢﴾

**Maksudnya:** Sesungguhnya orang yang menegaskan keyakinannya dengan berkata: "Tuhan kami ialah Allah", kemudian mereka tetap teguh di atas jalan yang betul, akan turunlah malaikat kepada mereka dari semasa ke semasa (dengan memberi ilham): "Janganlah kamu bimbang (dari berlakunya kejadian yang tidak baik terhadap kamu) dan janganlah kamu berdukacita, dan terimalah berita gembira bahawa kamu akan beroleh syurga yang telah dijanjikan kepada kamu. Kamilah penolong-penolong kamu dalam kehidupan dunia dan pada hari akhirat; dan kamu akan beroleh - pada hari akhirat - apa yang diinginkan oleh nafsu kamu, serta kamu akan beroleh - pada hari itu - apa yang kamu cita-citakan mendapatnya. (Pemberian-pemberian yang serba mewah itu) sebagai sambutan penghormatan dari Allah Yang Maha Pengampun, lagi Maha Mengasihani!"

بَارَكَ اللَّهُ لِي وَلَكُمْ فِي الْقُرْآنِ الْعَظِيمِ، وَنَفَعَنِي وَإِيَّاكُمْ بِمَا فِيهِ مِنَ  
الآيَاتِ وَالذِّكْرِ الْحَكِيمِ، وَتَقَبَّلَ مِنِّي وَمِنْكُمْ تِلَاوَتَهُ، إِنَّهُ هُوَ السَّمِيعُ  
الْعَلِيمُ، أَقُولُ قَوْلِي هَذَا، وَأَسْتَغْفِرُ اللَّهَ الْعَظِيمَ لِي وَلَكُمْ، وَلِسَائِرِ  
الْمُسْلِمِينَ وَالْمُسْلِمَاتِ، وَالْمُؤْمِنِينَ وَالْمُؤْمِنَاتِ، فَاسْتَغْفِرُوهُ إِنَّهُ هُوَ  
الْغَفُورُ الرَّحِيمُ.

## KHUTBAH JUMAAT KEDUA

الْحَمْدُ لِلَّهِ. الْحَمْدُ لِلَّهِ حَمْدًا كَثِيرًا كَمَا أَمَرَ. أَشْهَدُ أَنْ لَا إِلَهَ إِلَّا اللَّهُ  
وَخَدَهُ لَا شَرِيكَ لَهُ، وَأَشْهَدُ أَنَّ سَيِّدَنَا مُحَمَّدًا عَبْدُهُ وَرَسُولُهُ. اللَّهُمَّ  
صَلِّ وَسَلِّمْ وَبَارِكْ عَلَى سَيِّدِنَا مُحَمَّدٍ وَعَلَى آلِهِ وَأَصْحَابِهِ أَجْمَعِينَ. أَمَّا  
بَعْدُ، فَيَا عِبَادَ اللَّهِ، اتَّقُوا اللَّهَ حَقَّ تَقَاتِهِ لَعَلَّكُمْ تُفْلِحُونَ. قَالَ اللَّهُ  
تَعَالَى:

إِنَّ اللَّهَ وَمَلَائِكَتَهُ يُصَلُّونَ عَلَى النَّبِيِّ يَا أَيُّهَا الَّذِينَ ءَامَنُوا صَلُّوا عَلَيْهِ  
وَسَلِّمُوا تَسْلِيمًا

اللَّهُمَّ اغْفِرْ لِلْمُسْلِمِينَ وَالْمُسْلِمَاتِ وَالْمُؤْمِنِينَ وَالْمُؤْمِنَاتِ الْأَحْيَاءِ  
مِنْهُمْ وَالْأَمْوَاتِ. إِنَّكَ سَمِيعٌ قَرِيبٌ مُجِيبُ الدَّعَوَاتِ وَيَا قَاضِيَ  
الْحَاجَاتِ.

Ya Allah, ampunilah dosa-dosa dan kesalahan kami, ibubapa kami, ahli keluarga dan guru-guru kami. Limpahkanlah kesejahteraan, kedamaian dan kebahagiaan kepada kami semua dalam kehidupan di dunia dan di akhirat.

Ya Allah ! Ya Rahman ! Ya Rahim! Berikanlah taufiq dan hidayat-Mu kepada kami semua dan juga kepada pemimpin-pemimpin Negara kami, khasnya kepada Seri Paduka Baginda Yang di-Pertuan Agong Malaysia, dan juga pemimpin-pemimpin negeri

kami, khususnya Tuan Yang Terutama Yang di-Pertua Negeri Sarawak.

Ya Allah, Ya Dzal Jalali Wal Ikram! Kabulkanlah doa kami. Terimalah segala amal ibadah dan ketaatan kami kepada-Mu. Ya Allah, kukuhkanlah perpaduan dan kesatuan hati kami. Limpahkanlah ke atas kami nikmat kesihatan dan keafiatan. Kurniakanlah kesembuhan kepada mereka yang diuji dengan penyakit-penyakit dan bebaskanlah negara kami daripada segala perkara yang tidak diingini dan wabak penyakit, khususnya wabak COVID 19. Menangkanlah kami dalam memerangnya.

رَبَّنَا أُنَّا فِي الدُّنْيَا حَسَنَةٌ وَفِي الْآخِرَةِ حَسَنَةٌ وَقِنَا عَذَابَ النَّارِ. أَمِينَ،  
أَمِينَ يَا رَبَّ الْعَالَمِينَ.

عِبَادَ اللَّهِ. إِنَّ اللَّهَ يَأْمُرُ بِالْعَدْلِ وَالْإِحْسَانِ. وَإِيتَاءِ ذِي الْقُرْبَىٰ وَيَنْهَىٰ  
عَنِ الْفَحْشَاءِ وَالْمُنْكَرِ وَالْبَغْيِ. يَعِظُكُمْ لَعَلَّكُمْ تَذَكَّرُونَ. فَادْكُرُوا اللَّهَ  
الْعَظِيمَ يَذْكُرْكُمْ. وَاشْكُرُوهُ عَلَىٰ نِعْمِهِ يَزِدْكُمْ. وَاسْأَلُوهُ مِنْ فَضْلِهِ  
يُعْطِكُمْ. وَلَذِكْرُ اللَّهِ أَكْبَرُ. وَاللَّهُ يَعْلَمُ مَا تَصْنَعُونَ. أَقِيمُوا الصَّلَاةَ.